

## San Pablo Efeso Vu'ejoopo pa'inare chu'o tocha saosi'ea'me

*Chu'o saosi'ea'me*

<sup>1</sup> Chu'u, Pablo, Diopi chu'uuna Repau chu'ore chu'vaa'ku chini Jesucristo saocojñosi'kuam. Jã'aja'ñe pa'ikuji ija'ova utija'ova tocha saomu chu'u musanukonare Efeso vu'ejoopo pa'inare Dios neenare Jesucristo'te cuhama'ñe cuasanare. <sup>2</sup> Mai Ja'ku Dios Maire Paaku Jesucristona'me musanukona rekoñoãna re'oja'che pa'iche'te cho'okaijuna re'oja'che pa'ijũ'u.

*Dios maire Jesucristo neenajejuna re'oja'che cho'okaimu*

<sup>3</sup> Dios maire Jesucristo neenajejuna mai rekoñoã si'ache re'oja'che cho'okaimu Repau pa'icheja saijanajejuna. Jã'ajekuna Maire Paaku Jesucristo Puka'kure Diore pojoju, "Re'orepamu", chiñu mai. <sup>4</sup> Chuta'a cheja cho'omarumuna chẽasi'kuam Dios maire, na'a pa'isirumuna maipi Jesuni jovo Repau neenajeju ũcuau ñaku'te re'oja'che cho'ojũ paapu chini. <sup>5</sup> Maini oiũ apereparumu chuta'a mai peorumu maipi Repau chiĩ paapu chini chẽa jo'kaasomu Dios, Jesucristo cho'okaijachejekuna. Dios maire cho'ora chiisi'e ũcuarepa cho'osi'kuam Repau, Repauni cho'ouakuna. <sup>6</sup> Repau maire re'oja'che cho'okaiche'te maipi ña pojoju Repauni re'oja'che i'kaa'ju chini jã'aja'ñe cho'osi'kuam Dios. Maire Jesús neenare ruu re'oja'che cho'okaimu Repau Jesure ruu chiikujeku. <sup>7</sup> Dios maire oiũ ruu re'oja'che cho'okaisi'kuam Jesucristo neena paapu chini. Jesucristo maire Repau chiepi jũni ro'ikaisi'jekuna Repau neenajejuna Dios maire,

“Cu'ache cho'osi'e ro'iche peomu inare”, chiija'mu. Jã'ajekuna mai cu'ache cho'osi'e jo'e cuasama'mu Dios. <sup>8</sup> Ūcuachi'a maipi Repau pa'iche'te karama'ñe masiju maire Repau cho'okaiche'te masia'ju chini maini oi ru re'oja'che cho'okaisi'kuam Dios. <sup>9</sup> Repau aperumu, “Jã'aja'ñe cho'oja'mu chu'u”, chiisi'e Jesucristo irumu cho'osi'e churana maipi masia'ju chini te'erũhiñe peore kumu Repau aperumu kumamesi'e. <sup>10</sup> Repau chiisirumu ti'ato cheja pa'inare cho'ora chini cuasasi'e peore cho'o pi'nija'mu Dios. Reparumu cunumu pa'inana'me cheja pa'ina ũcuanuko Jesucristo neenachi'a pa'iju karama'ñe re'oja'chechi'a ja'me paapu chini cho'oja'mu Repau.

<sup>11</sup> Maire Jesucristo'te cuasanare aperumuna chẽasi'kujeku irumu soisi'kuam Repau maire, Repau neena paapu chini. Si'arumu si'ache cho'omu Dios Repau chiicheji ũcuarepa ti'jñea'ku chini. <sup>12</sup> Chukuna'te judiõpãi Jesucristo'te charo cuasaju jovosinani chẽasi'kuam Dios, chukunapi re'oja'che pa'ijuna pãipi ña Repauni re'oja'che cutua'ju chini. <sup>13</sup> Musanukona ũcuachi'a Dios chu'orepa asasirumu, “Repauni cuasaju jovoru Dios musanukona rekoñõã re'ojarekoñõã care'vakaija'mu”, chiiche'te asa chẽa Jesucristo'te jovosinaa'me. Jovorena Dios musanukonare Jesucristo neenajejuna Repau Rekocho'te raosi'kuam, ja'me pa'ina Repau cho'okaisi'ere masia'ju chini, ũcuachi'a musanukonare Jesucristo paache'te masia'ju chini. <sup>14</sup> Dios Rekochoji ja'me pa'ina maire Repau re'oja'che cho'ojachere jachama'ñe cuasaju cha'ame mai, chuta'a karache ĩsirumujat'ka. Reparumu t'ana Repau'te si'ache re'oja'che cho'okaiku'te pojoju re'oja'che i'kajanaa'me mai.

*Pablo Dion* s̃ekaimu repanapi re'oja'che pa'imasia'ju chini

<sup>15</sup> Jã'ajekuna musanukonapi Maire Paaku'te Jesure cuasaju Dios neenare ũcuanukore oijuna jã'are asasirumupi vna, <sup>16</sup> Diore s̃eni si'arumu, "Re'orepamu", chiiu pa'imu chu'u musanukonani s̃ekaiu. <sup>17</sup> Mai Ja'kure Diore si'arumu ija'che s̃ekaiu pa'imu chu'u musanukonare, Maire Paaku'te Jesucristo'te Paaku'te, Peore Masiku'te: "Ja'ku, mu'u Rekocho'te chũ'ujũ'u, repanani che'chona cuasamasiju mu'u pa'iche'te na'a rua masia'ju", chiimu chu'u Repau'te. <sup>18</sup> Ũcuachi'a Repauji musanukona rekoñoña che'chokuna Repau re'oja'che cho'okasa chini soisi'ere masiju pojoju cha'aa'ju chini Diore s̃ekaimu chu'u musanukonare. Re'oja'che si'ache karama'ñe ĩsija'mu Repau musanukonare Repau neenare. <sup>19</sup> Ũcuachi'a maire Repau'te cuasanare Repau'chi'a peore masiku cho'okaiche'te asa masia'ju chini Diore s̃ekaimu chu'u musanukonare. Peore Masijeku, <sup>20</sup> Cristo'te, jũniso tãcojñosi'kure vaso eto Repau pa'ichejana canaumuna mu'a Repau ujjajũtu cakã'kore ñu'iu ja'me chũ'ua'ku chini jo'kaasomu. Jã'aja'ñe peore Cho'omasijekumu maire ũcuaja'che Repau masicheji rua cho'okaimu.

<sup>21</sup> Diopi chũ'unana chekunare ũcuanukore chũ'uku'mu Cristo. Rua masinarejẽ'e na'a rua masimu Repau. Aijeku ángel chũ'unare chũ'uku'mu. Ũcuachi'a pãi chũ'unana'me vati chũ'unana ũcuanuko Repau ũsema'ñechi'a cho'onaa'me. Chura pa'inare chũ'unana'me na'a pa'isirumu pa'ijanare ũcuanukore repa cho'oñu chiiche'te ũseuato ũseku'mu Repau. <sup>22-23</sup> Diopi jo'kauna peore Cristo neea'me. Aijeku Peore Masiku Repau cho'ora chiiche peore cho'okumu Repau'te cuasanare ũcuanukore si'achejñarua pa'inare re'oja'che

cho'okaiꝯ paaku'mꝯ Repaꝯ. Mai Repaꝯ'te cuasana kueñe pa'inajeju Repaꝯ ca'nivuja'ñe pa'inaa'me. Repaꝯta'ni maire Repaꝯ neenare chũ'ukuꝯjeku mai rekochoja'che pa'iku'mꝯ. Pãiu'te rekochoa'me ca'nivꝯ paato karama'mꝯ repaꝯ'te. Repaꝯ Cristo peore Masiuꝯjeku, peore Paaku, si'achejña pa'iu si'ache cho'oku'mꝯ. Jã'ajekuna maire Repaꝯ neenare pa'imasiche karama'mꝯ, Repaꝯji cho'okaiꝯna.

## 2

*Dios maire oiꝯ* chẽa paamu

<sup>1</sup> Aperumu musanukonapi cu'achechi'a cho'oñu chiiꝯna cuheku sējosi'kuꝯ'mꝯ Dios. Repaꝯji ñato jūnisosinaja'ñe pa'isinaa'me musanukona. <sup>2</sup> Reparumu musanukona Diore cuasamanajeju cu'ache cho'oju Diore cuasamana pa'iche pa'isinaa'me. Vati ai paana pa'isinaa'me musanukona. Repaꝯ vati ai Diore jachanare chũ'uku'mꝯ. <sup>3</sup> Mai ũcuanuko Diore jachana pa'isinaa'me aperumu. Si'ache cu'ache maire cho'ouache cho'oju mai cuasache cu'a ũcuuache vajuꝯchache cho'osinaa'me mai. Jã'ajekuna Dios chekunare pãi cu'ache cho'onare pe'ruku sējoku maire ja'me sējosi'kuꝯ'mꝯ. <sup>4</sup> Jã'ata'ni Pãi Oi Aijeku maire ruꝯa chiikuꝯjeku Dios <sup>5</sup> maire cu'are cho'oju rekoñoã jūnisosinaja'ñe pa'inareta'ni chẽa paaku mai rekoñoã vajuꝯche ĩsisi'kuꝯ'mꝯ Repaꝯ. Maini oiꝯ peore Masiuꝯjeku Jesucristo'te vasosi'kuꝯpi ũcuachi'a mai rekoñoã re'ojarekoñoã care'vakaisi'kuꝯ'mꝯ Repaꝯ, re'oja'che paapu chini. <sup>6</sup> Repaꝯ Dios maire Jesucristo neenajeju Repaꝯ'te vasosi'epi mai rekoñoã vajuꝯche'te ĩsi Repaꝯ'te kueñe pa'iche jo'kasi'kuꝯ'mꝯ. <sup>7</sup> Jesucristo neenajeju ruꝯa re'oja'che cho'okaiku'mꝯ Dios maire, na'a pa'isirumuna pãipi ña ija'che i'kaa'ju chini: “Dios Pãi Oi Aijeku Repaꝯ neenare si'ache re'oja'che

cho'okaimu”, chiiju masia'ju chini. <sup>8</sup> Dios maire Repau'te cuasanare oi u mai rekoñoã re'ojarekoñoã care'vakaisi'kuu'mu re'oja'che paapu chini. Mai rekoñoã meñe care'vavesume mai. Diota'ni Masikujeku maire rupu cho'okaisi'kuu'mu. <sup>9</sup> Maipi, “Chukuna ruu pa'imasinaa'me”, chiimanea'ju chini mai rekoñoã meñe care'vamasiche jo'kamanesi'kuu'mu Dios maire. <sup>10</sup> Diopi cho'ouna pa'inaa'me mai. Maire Jesucristo neenare soisi'kuu'mu Repau, re'oja'che cho'oj u aperumu Repau maire jo'kasi'ere cho'oj u paapu chini.

*Jesucristoji cho'okai*una re'oja'che ja'me pa'ire'omu maire

<sup>11</sup> Jã'ajekuna musanukona judío peona ainesina iere cuasajũ'u: Judíopãi, “Dios neenajeju jíkora'muru chã'tiru pa'ica'niru chuto tuacojñosinaa'me chukuna”, chiime. Musanukonani cuheju, “Dios neena peonajeju jíkochã'tiru chuto tuacojñomanesinaa'me ina”, chiime repana. Jã'ata'ni jã'aja'ñe cho'oche rupu pãi cho'oche'me, chekuna pãi ca'nivũã chutoche. <sup>12</sup> Aperumu musanukona judío peona Cristoni vesuju Repau neena pa'imatesinaa'me. Israelpãi ja'me pa'icu'asi'kuu'mu musanukonare, repanapi cuheju. Ūcuachi'a Dios neena peonajeju Repau, “Cho'okaija'mu chu'u”, chiisi'e koomanejana pa'isinaa'me musanukona. Dioni vesuju Repau'ni cuasama'ñe pa'ijuna Repau pa'icheja saiche peosi'kuu'mu musanukonare, cho'okaikuj peokuna. <sup>13</sup> Jã'ata'ni Jesucristo Repau chiepi jüni ro'ikaisi'jekuna musanukona Repau neena aperumu ruu so'o pa'isina Diore kueñe pa'ime chura. <sup>14</sup> Repau Cristoji cho'okaisi'jekuna Ūcuana'me re'oja'che pa'ime mai chura. Mai ūcuachi'a judíopãina'me judío peona ūcuanuko Repauna'me re'oja'che pa'ij u sãiñechi'a re'oja'che ja'me pa'ime.

Repau cho'okaisi'ejekuna sāiñechi'a cuhema'me mai chura. Ka'chakuanu pa'isina ũcuate'eujakuanupu pa'ime chura.

<sup>15</sup> Aperumu Dios chũ'u jo'kasi'e peore cho'omanesinare ro'iche pa'isi'kuam, jachache ro'i. Chura jā'aja'ñe pa'ima'mu maire, Dios chũ'ũne jachanareta'ni Cristo jūni ro'ikaisi'ejekuna. Aperumu mai sāiñechi'a cuhesinaa'me. Chukuna judiōpāi Dios chũ'u jo'kasi'e masina musanukonare judiō peonare cuhesinaa'me Dios chũ'u jo'kasi'ere vesujuna. Churata'ni Cristo'te Ũcuate'eu'te cuasanajeju majapāija'ñe pa'ime mai. Jā'aja'ñe pa'inajeju sāiñechi'a re'oja'che ja'me pa'ime mai. <sup>16</sup> Maipi ũcuate'eujakuanupu pa'iju ũcuanuko Dioni re'oja'che ja'me paapu chini mai sāiñechi'a cuheche'te sējokaiu jūni ro'ikaisi'kuam Cristo maire. <sup>17</sup> Repau Cristo caje musanukonare judiō peonare so'o pa'isinana'me chukuna'te judiōpāire, “Diore kueñe pa'ime mai”, chiisinare Dios chu'ore chu'vasi'kuam Repau maipi Diona'me re'oja'che pa'iju sāiñechi'a re'oja'che ja'me paapu chini. <sup>18</sup> Repau cho'okaisi'ejekuna Repau Rekocho Ũcuate'erekochoji maini ka'chakuanupua pa'isinani ũcuanukore ja'me pa'iu cho'okaiuna mai Ja'kure Diore kueñe pa'iju Repau'te sēere'omu maire.

<sup>19</sup> Jā'ajekuna chura musanukona judiō peona Diopi ñato tīinama'me. Chekunare Dios neenare majapāija'ñe pa'ime musanukona chura. Mai ũcuanuko Dios chiia'me. <sup>20</sup> Mai ũcuanuko Dios vu'e chuta'a cho'o pi'nimavu'ēja'che pa'ime. Dios maire re'oja'che pa'iche che'choku vu'e ruu re'ojavu'e cho'ocheja'che cho'omu Repau maire. Chukunapi Jesús saosinana'me Repau chu'o kuanapi chuvajuna asa chēa cuasaju jovosinaa'me musanukona. Jesucristoji jūni ro'ikakuna

chura ũcuanũko Dios neenaa'me mai. <sup>21</sup> Cristoji cho'okaiũna mai ũcuanũko sãĩñechi'a re'oja'che ja'me pa'ijũ Dios vũ'e chuta'a ṽẽe pi'nimavũ'ejekũna si'arũmũ na'a rũa re'ojavũ'e ṽẽeñeja'ñe pa'ime mai. <sup>22</sup> Jesucristoji cho'okaiũna mũsanũkona judío peona ũcuachi'a Repaũni cuasajũ pa'iche re'oja'chere che'chejũ vũ'e rũa re'ojavũ'e cho'oju pa'icheja'che pa'ime. Ũcuachi'a Repaũ Rekochoji mũsanũkona rekoñoãre ja'me pa'ĩna chũkunana'me Dios vũ'e re'ojavũ'eja'che pa'ime.

### 3

*Pablo'te judío peonare chũ'vaa'ku chini jo'kasi'ea'me*

<sup>1</sup> Chũ'ũ, Pablo, mũsanũkonare judío peonare Jesucristo pa'iche chũ'vakũna pãipi ch̃ẽa cuaorena pãi ch̃ẽavũ'ere pa'imũ. <sup>2</sup> Dios chũ'ũni re'oja'che cho'okaiũ Repaũ chũ'o mũsanũkonani judío peonani chũ'vaa'ku chini jo'kasi'ku'a'mũ. Jã'a asacosome mũsanũkona. <sup>3</sup> Chũ'ũpi chũ'vaa'ku chini aperũmũ kuãmanesichũ'o churana kuasi'ku'a'mũ Dios chũ'ũre. Chura repachũ'o kuache jmamakarũ kuaku tochasi'ku'a'mũ chũ'ũ mũsanũkonare. <sup>4</sup> Mũsanũkonapi ija'ova'te peore ñani Cristo mũsanũkonare judío peonare cho'okaiche'te aperũmũ kuãmanesi'ere chũ'ũ masiche'te ña masijanaa'me. <sup>5</sup> Aperũmũ pa'isinare irũmũ mai masiche kuãmanesi'ku'a'mũ Dios. Chura Dios Rekocho chũkũna'te, Repaũ neena Jesucristo saosinana'me Repaũ chũ'o kuãanare kuasi'ku'a'mũ, che'choa'ju chini. <sup>6</sup> Iea'me Repaũ chura kuacuhasi'e: Chura Jesucristo'te cuasache kuachũ'ore asa ch̃ẽa judío peona Dios ch̃ĩia'me judíopãina'me. Chura ũcuate'eũjakuanupũ pa'ijũ peore Jesucristo cho'okaiche'te ja'me koojanaa'me.

<sup>7</sup> Mũsanũkonare judío peonani Dios chũ'ũre Jesucristo'te cuasache kuachũ'ore si'arũmũ chũ'vakũ

paau chini jo'kasi'kuu'mu. Peore Masikujeku chu'upi masi chu'vaa'ku chini cho'okaimu Repau chu'ure. <sup>8</sup> Chu'ure Repau neenare na'a rua cu'ache cho'osi'kureta'ni soisi'kuu'mu Dios, musanukonare judío peonani Jesucristo Repau neenare karama'ne re'oja'che cho'okaiche'te chu'vaa'ku chini. <sup>9</sup> Ūcuachi'a chu'ure si'avājupāi che'choche jo'kasi'kuu'mu Dios, chejana'me repacheja pa'iche peore Cho'osi'ku aperumu cho'ora chiisi'e kumanesi'ere repanapi masia'ju chini. <sup>10</sup> Jā'aja'ne cho'osi'kuu'mu Repau irumu canapi si'avājupāi judiōpāina'me judío peona Jesure cuasaju ja'me chi'iju ūcuate'eujakuanupu pa'ijuna ángelena'me vati Repau si'ache peore masiche'te ña masia'ju chini. <sup>11</sup> Aperumu Dios Repau cho'ora chiisi'e Jesucristoni Maire Paakuni chu'una cho'ocuhasi'kuu'mu. <sup>12</sup> Chura Jesucristoji Maire Paakujī cho'okaiuna, “Dios chu'ure pojoja'mu”, chiiju cuasa, vajuchuma'ne Diore sēere'omu maire Repau'te cuasanare. <sup>13</sup> Jā'ajekuna chu'u musanukonani chu'vaku cu'ache cho'ocojño'ne'te cuasaju sumava'na pa'imanejū'u, chiimu chu'u. Chu'upi musanukonani re'oja'che cho'okaiuna pojojū'u.

*Jesucristo maire rua chiimu*

<sup>14</sup> Jā'are peore cuasaku ro're ñu'iu mai Ja'kuni sēekaimu chu'u musanukonare. <sup>15</sup> Ūcuauji cho'ouna si'avājupāi cunatumu pa'inana'me cheja pa'ina pa'ime. <sup>16</sup> Mai Ja'kuni sēekaimu chu'u, si'ache peore Paaku Dios, Rekochoji musanukona rekoño'ana cho'okaiuna na'a masi cuasaju cu'ache juvomasiju re'oja'che paapu chini. <sup>17</sup> Cristoji musanukonare Repau'te cuasanani ja'me pa'iu chu'ukuna Repau chiiche cho'oju paapu chini sēemu chu'u. Ūcuachi'a Repauji cho'okaiuna musanukonapi chekunani si'arumu cuasaju paapu



chini s̄emũ chu'ũ. <sup>18</sup> Mai Jesús neenapi Repau maire chiiche'te ũcuanũko masiũu chini s̄emũ chu'ũ. Repau maire cuasaku ruu oiũ re'oja'che paamu. <sup>19</sup> Cristo maire oiche'te na'a ruu masia'ju chini s̄ekaimũ chu'ũ. Jã'ata'ni ruuarepajekũna peore masicu'amũ maire. Diopi re'oja'chechi'a Pa'ikũji musanũkonani re'oja'che cho'okaiũna Repau pa'icheja'che re'oja'che pa'imasia'ju chini s̄emũ chu'ũ.

<sup>20</sup> Dios pãi ũcuanũkore pojocojñokũ paaũ. Repau mai rekoñoã care'vakaiũ'mũ. Peore Masikũjekũ si'ache re'oja'che cho'okaimasimũ maire. Mai s̄eñe cho'okaiũ s̄ema'ñejẽ'e cho'okaimũ. Mai s̄eñũ chiiche na'a cajejaiche cho'okaiũ mai s̄ecuasama'ñejẽ'e si'ache peore re'oja'che cho'okaimũ Repau. <sup>21</sup> Jã'ajekũna Jesucristo maire cho'okaiũjekũna mai Repau'te cuasana Dioni si'arũmũ cuhama'ñe pojojũ paũ. Jã'aja'ñe paaũ.

## 4

*Dios Rekochoji cho'okaiũna* re'oja'che ja'me pa'iche'te kũamũ

<sup>1</sup> Dios maire si'ache re'oja'che cho'okaikũ'mũ. Jã'ajekũna chu'ũ Repau chũ'ũñe cho'okaikũjekũ pãi chẽavu'ere pa'ikũji musanũkonare iere ruu chu'vamũ: Dios soicojñosinaa'me musanũkona. Jã'ajekũna Dios soicojñosina pa'iche pa'ijũ'ũ. <sup>2</sup> "Masinaa'me chũkũna", chiima'ñe pe'kerũ pa'ijũ na'mi pe'ruma'ñe musanũkonare ja'me pa'ina cu'ache cho'osi'e cuasama'ñe re'oja'che pa'ijũ sãĩnechi'a cuasajũ'ũ. <sup>3</sup> Musanũkona cavamairo pa'ijũ re'oja'che pa'iche ũhasoma'ñe Dios Rekochoji cho'okaiũna peore cho'ore'ochetu'ka cho'ojũ si'arũmũ re'oja'che ja'me pa'ijũ'ũ. <sup>4</sup> Mai ũcuanũko Jesucristo'te Ũcuate'eu'te cuasanajeju Repau ca'nivuja'ñe pa'ijũ

ũcuate'eujakuanupũme. Dios Rekocho maire ũcuanũkore ja'me pa'imũ. Dios maire ũcuanũkore soisi'kuuamũ Repau pa'ichejana sara chini. Jã'are cha'ame mai ũcuanũko. <sup>5</sup> Jesús maire ũcuanũkore Paakũmũ. Mai ũcuanũko Ũcuate'eũ'te cuasanaa'me. Mai ũcuanũko Jesuni cuasajũ okorocojñosinaa'me. <sup>6</sup> Dios maire ũcuanũkore Paakũmũ. Mai ũcuanũko Ja'kuuamũ Repau. Maire ũcuanũkore chũ'ũku Repau'te cho'okaimasiche'te jo'kamũ. Ũcuanũkore maire ja'me pa'imũ Repau.

<sup>7</sup> Jã'ata'ni cho'omasiche ũcuanũko si'acairo koosinaa'me mai, Jesucristo ïsira chiisi'e. <sup>8</sup> Jã'ajekũna Dios chũ'o aperũmũ tocha jo'kasi'e ija'che kuamũ:

Vati chẽa paasinare tua cunaũmũna mũni re'oja'chere repanare jo'kasi'kuuamũ Repau, chiimũ. <sup>9</sup> “Mũisi'kuuamũ” chini, ¿je'se chiiku? Ija'che chiimũ: “Mũisi'kuuamũ” chini “Charo chejana cajesi'kuuamũ” chiimũ. <sup>10</sup> Cheja cajesi'kuupi cunaũmũ jã'achojena mũisi'kuuamũ, Dios pa'ichejare pa'iu peore chũ'ũra chini. <sup>11</sup> Ũcuauji maire ũcuanũkore cho'omasiche si'acairo jo'kasi'kuuamũ Repau'ni cho'okaiju paapu chini. Chũkũna'te te'enare pãire Dios chũ'ore aperũmũ kuamanesichũ'ore ku'iju chũ'vaa'ju chini saosi'kuuamũ Repau. Chekũnare Dios chũ'o kuakaina paapu chini jo'kasi'kuuamũ. Chekũnare Repau'ni cuasaa'ju chini chũ'vache'te jo'kasi'kuuamũ. Chekũnare Repau'te cuasanani kuiraju paapu chini jo'kasi'kuuamũ. Chekũnare Repau'te cuasanare che'choche'te jo'kasi'kuuamũ. <sup>12</sup> Jã'aja'ñe cho'osi'kuuamũ Cristo, maipi ũcuanũko Repau neenapi Repau ca'nivũja'ñe pa'iju ũcuate'eujakuanupũ pa'iju Repau'ni cho'okaiju na'a rũa masi cuasajũ sãĩñechi'a re'oja'che cho'okaiju re'oja'che paapu chini. <sup>13</sup> Mai

ũcuanũko Dios Mamakũni Ũcuate'eu'te cuasaju jā'aja'ñe cho'oju Repau pa'iche'te masiju si'arumu na'a rua re'oja'che pa'iju Repau chiiche cho'oju pa'ijanaa'me. Ũcuachi'a Dios pa'ichejana sani Repau Cristo pa'icheja'che karama'ñe re'oja'che pa'ijanaa'me mai.

<sup>14</sup> Maipi sāiñechi'a re'oja'che cho'okani chiiva'na vesucheja'che vesuma'ñe pāi jorena ũcuana rani chekere che'choto tuta saoma'ñeja'ñe repa che'choche asa chēamanejanaa'me. Ũcuarepare Dios chu'o jo'kasoma'ñe cuasaju tīñe pa'ina chu'o asa chēamanejanaa'me mai.

<sup>15</sup> Dios chu'o ũcuarepare asa chēa pa'iju chekunare oiju si'arumu na'a rua re'oja'che pa'iju Maire Paaku Cristo chiiche si'ache cho'oju pa'ijanaa'me mai. Repau Cristo Maire Paaku mai rekochoja'che pa'iku'mu.

<sup>16</sup> Mai ũcuanũko Repauji cho'okaiuna Repau ca'nivuja'ñe pa'inajeju ũcuate'eujakuanupu pa'iju sāiñechi'a cuasaju mai cho'omasicheji re'oja'che cho'okaiju pāi ca'nivu aineeña'ñe si'arumu na'a rua re'oja'che pa'ime.

*Cristo'te cuasana mama pa'iche'te kumu*

<sup>17</sup> Maire Paakuji chũ'ukuna cu'ache cho'oma'ñe paapu chini kumu chu'u musanukonare. Ũcuamakarũ Diore cuasamana pa'icheja'che pa'ijũ'u. Repana rekoñoã peoche cuasaju peoche pa'inaa'me repa. <sup>18</sup> Chija'ina ñacu'acheja'che asavesume repa. Asacuheju Dios chu'o asoma'mu repanare. Jā'ajekuna Diore cuasamapu pa'ivesume repa. <sup>19</sup> Asacuheju ũcuache cu'ache cho'oju juvoma'ñe si'ache tīñe cho'onaa'me repa.

<sup>20</sup> Musanukona Jesucristo'te apecuasarumu jā'aja'ñe pa'iche che'chemanesinaa'me. Jā'aja'ñema'mu Repau neena pa'iche. <sup>21</sup> Pa'iche ũcuarepare Jesús pa'iche asa Repau neena pa'iche che'chesinacosome

mʉsanʉkona. <sup>22</sup> Jã'ajekʉna aperʉmʉ mʉsanʉkona pa'ijʉ cho'osi'eja'che cho'omanejũ'ʉ. Reparʉmʉ mʉsanʉkona pojoñu chini si'arʉmʉ na'a rʉa cu'ache cho'oju peoche cho'oju pa'isinaa'me. <sup>23</sup> Chura mʉsanʉkonare mamarekoñõãre paajʉna re'oja'chere cuasache pa'imʉ. <sup>24</sup> Mamakãa saño sacheja'che mama pa'ijũ'ʉ. Pa'iche mamare jo'kasi'ku'a'mʉ Dios mʉsanʉkonare, Repaʉ neenajeju Repaʉ pa'icheja'che re'oja'che pa'ijʉ ũcuarepa cho'oa'ju chini.

<sup>25</sup> Jã'ajekʉna ũcuamakarʉ jorechʉ'o i'kajũ'ʉ. Chekʉnare i'kani ũcuarepare i'kajũ'ʉ. ũcuanko Jesús neenajeju ũcuate'eujakuanupʉ pa'ijʉ majapãijanaa'me mai. <sup>26</sup> Teakʉna cu'ache cho'omanejũ'ʉ. Pe'rusi'e ũcuamucuse cavesʉsojũ'ʉ. <sup>27</sup> Vati'e cu'ache chũ'ũñe jo'kamanejũ'ʉ. <sup>28</sup> Ñaaneena ñaañe jo'kaso cho'oche'te cho'oju pa'ijũ'ʉ. Cho'oche'te cho'oju kuri koo chʉova'na pa'iva'nare cho'okaire'oche paajũ'ʉ.

<sup>29</sup> Cu'ache i'kama'ñe re'oja'chechi'a i'kajũ'ʉ, mʉsanʉkona i'kache'te pãipi asa vajʉ na'a re'oja'che paapʉ chini. <sup>30</sup> Cu'ache cho'omairo pa'ijũ'ʉ, Dios Rekochoji Samarekocho pa'imanea'ku chini. Repaʉji ja'me pa'ina Repaʉ pa'icheja saijache masime mai.

<sup>31</sup> Cu'ache cuasache'te ũhasojũ'ʉ, teachena'me pe'ruju rʉa i'kache, chekʉnare cu'ache cutuchena'me chekʉnare si'ache cu'ache cho'oche peore. <sup>32</sup> Sãinechi'a oiju re'oja'che cho'oju pa'ijũ'ʉ. Dios mʉsanʉkonare Cristo neenajeju cu'ache cho'osi'e cuasama'ñeja'ñe mʉsanʉkonare ja'me pa'ina cu'ache cho'osi'e cuasamanejũ'ʉ.

1 Puka'kupi mamakuni oiuna puka'ku pa'iche'te mamaku ñaku che'checheja'che Muja'ku Dios pa'iche'te che'cheju pa'ijũ'u musanukona. 2 Chekunare oiju pa'ijũ'u Cristo maire oicheja'che. Maini oi Diopi pojoa'ku chini mai cu'ache cho'osi'e ro'i jũni ro'ikaisi'kuam Repau.

3 Umupai, murũjo peonare umuneema'ne pa'ijũ'u. Romi ũcuaja'che muũju peonare umuneema'ne pa'ijũ'u. Cheke cu'a ũcuuache vajuachuache cho'oma'ne pa'ijũ'u. Ūcuachi'a chekuna nee tua paauache ñamanejũ'u. Jã'aja'ñema'mu Dios neena pa'iche. Jã'ajekuna peore jã'aja'ne cho'оче cutuma'ne pa'ijũ'u.

4 Chu'o cu'achena'me vë'vechu'o vajuachuache i'kama'ne pa'ijũ'u. Dios neena pa'ichema'mu jã'a. Jã'aja'ne i'kama'ne pa'iju Dioni pojoju si'arumu, "Re'orepamu, Ja'ku", chiiju pa'ijũ'u. 5 Ūcuare ie masime musanukona: Cu'ache cho'ona Jesús paamanajeju Dios pa'icheja saima'me. Umupai repa rũjo peonare romineenana'me romi repa muũju peonare umuneenana'me cheke cu'a ũcuuache vajuachuache cho'ona Dios pa'icheja saima'me. Ūcuachi'a chekuna paache ña tua paauache cuasana pösechi'a cuasaju Diore cuasama'me. Jã'ajekuna tũosiva'nani cuasaju pojocheja'che cuasanajejuna Dios pa'icheja saicu'amu reparare. 6 Jã'ajekuna pãipi musanukonani, "Cho'ore'omu jã'a", chiito jachajũ'u. Dios jã'aja'ne cu'ache cho'onare ñani pe'ruku cu'ache cho'osi'e ro'iche chũ'umu, Repau chũ'uñe jachanajejuna. 7 Jã'ajekuna musanukona repa pa'iche ña chëamanejũ'u.

8 Aperumu musanukona Dios pa'iche'te vesuju chijacheja'che cu'ache cho'oju pa'isinaa'me. Jã'ata'ni musanukona chura Maire Paakuni cuasaju miañeja'ne

re'oja'che pa'ime. Jã'ajekuna miañeja'ñe re'oja'chere cho'oju pa'ijũ'u. <sup>9</sup> Jesuni cuasaju miañeja'ñe pa'iche ija'chea'me: Si'ache re'oja'che cho'ochena'me Dios chũ'uñe cho'ochena'me ũcuarepa cho'oche. <sup>10</sup> Maire Paaku chiiche'te che'che cho'oju pa'ijũ'u Repauji pojoa'ku. <sup>11</sup> Chijachejaja'che pa'ina peoche cho'oche ja'me cho'oma'ñe pa'iju repana cho'oche ñani, "Cu'ache'te cho'ome musanukona", chiiijũ'u, repana cho'oche'te masia'ju. <sup>12</sup> Repana rope'e cho'oche i'kavajuchache'me. <sup>13</sup> Jã'ata'ni musanukonapi i'kato miañe peore ñoñeja'ñe repana cu'ache cho'oche cuasoja'mu repanare. Chekurumu repana cu'ache cho'oche'te cuasani ũhaso miañeja'ñe re'oja'che pa'ijanaa'me. <sup>14</sup> Jã'ajekuna Dios chu'o tochasi'e ija'che kumu:

Vuijũ'u mu'u, kãnisosi'kuja'che pa'iku.

Cristoni cuasa vajujũ'u, mu'uni miañeja'ñere re'oja'che pa'iche'te ñsia'ku,

chiimu.

<sup>15</sup> Jã'ajekuna ñamema'ñe si'arumu re'oja'che cho'oju pa'ijũ'u. Pa'ivesuna pa'icheja'che pa'imanejũ'u; pa'imasina pa'iche pa'ijũ'u. <sup>16</sup> Irumu ruu cu'ache cho'ome pã. Jã'ajekuna musanukonapi Dios chiiche'te si'arumu cho'oju pa'ijũ'u. <sup>17</sup> Masi cuasamana cho'ocheja'che cho'omanejũ'u. Maire Paaku chiiche'te asa chẽa cho'oju pa'ijũ'u. <sup>18</sup> Conore ũku jũ'iju pojomanejũ'u. Dios Rekochoji paaku cho'okaiuna re'oja'chere cho'oju pojojũ'u. Dios Rekochoji musanukonani paato pojojũ'u pa'ijanaa'me musanukona. Conore jũ'iju pani cu'ache cho'oche'te juvovesuju musanukona rekoñoã cacu'asojanaa'me. <sup>19</sup> Dioni pojoju ujare ujaju Dios chu'ore i'kaju sãñeche'i'a re'oja'che che'chojũ'u. Musanukona rekoñoãpi pojojũ'u ujjũ'u,

Maire Paakuji asa pojoa'ku. <sup>20</sup> Musanukonani ũcuache ti'ñeto mai Ja'kure Diore si'arumu, "Re'orepamu", chiiu pa'ijũ'u, Maire Paakuni Jesucristoni cuasaju.

Ûjuna'me rũjo re'oja'che pa'iche'te kuamu

<sup>21</sup> Musanukona Cristo'te cuasaju sãñechi'a ña, kukuju pa'ijũ'u. <sup>22</sup> Romi, muũjupã ña, kukuju pa'ijũ'u Maire Paaku'te vajuacheja'che. <sup>23</sup> Cristo Repau neenare chũ'uñeja'ñe ãjupi rũjoni chũ'ua'ku chini jo'kasi'kuamu Dios. Ūcuachi'a Cristo Repau neenare vati toa sani uuche Æsekaiku'mu, Repau ca'nivuja'ñe pa'iju ũcuate'eujakuanupu pa'inare. <sup>24</sup> Cristo neena repanare Paaku chũ'uñe'te cho'oto re'omu. Ūcuaja'che rũjoromi repana ãjupã chũ'uñe'te peore cho'oto re'omu.

<sup>25</sup> Umupã, murũjoromi oiju paajũ'u, Cristo Repau neenare oiu jũni ro'ikaisi'eja'che. <sup>26</sup> Mai Repau chu'ore asa chãa Repau'ni jovorena mai cu'are tunosokakuna rekoñoã re'ojarekoñoã paa'ju chini maini jũni ro'ikaisi'kuamu Repau, maini paara chini. <sup>27</sup> Jã'aja'ñe Cho'osi'kupipi jo'e rani maire Repau'te cuasanare sa paaku jmamakarujẽ'e cu'achejẽ'e peonare re'onare caruñoja'mu Repau maire Repau neenare. <sup>28</sup> Umupã musanukona ca'nivua oiju kuiracheja'che murũjoromi oiju kuiraju pa'ijũ'u. Rũjore oiku meñe oicheja'che oimu. <sup>29-30</sup> Pã te'eujẽ'e meñe kuhema'ñe kuiraju ãu ãiju pa'ime. Cristo ũcuaja'che maire Repau'te cuasanare ũcuanukore ũcuate'eujakuanupu pa'iju Repau ca'nivuja'ñe pa'inare kuiraku'mu. <sup>31</sup> Dios chu'o aperumu tocha jo'kasi'e ija'che kuamu:

Umujji romio'te veja puka'kupã ja'me pa'isi'e jo'kaso rũjona'me pani ũcuate'euja'chea'me Diopi ñato,

chiimũ. <sup>32</sup> Rũa asavesamũ jã'a. Jã'ata'ni Jesucristo Repamũ'te cuasanare paache'te kuamũ repa tocha jo'kasi'e. Repamũ neena ũcuanũko Repamũ ca'nivũ ũcuate'eca'nivũja'ñe pa'ijũ ũcuate'eũjakuanupũ'me. <sup>33</sup> Dios chũ'o aperumũ tocha jo'kasi'e kuache'te kuakũ ũcuachi'a chũ'u aperumũ i'kasi'ere jo'e i'kara, ũcuare i'kasi'kuta'ni. Umũpã, murũjoromi oijũ paajũ'u mũsanũkona meñe oicheja'che. Ũcuachi'a romi, mũũjũpã ña, kukujũ pa'ijũ'u, chiimũ chũ'u.

## 6

*Puka'kupãina'me mamachĩ re'oja'che pa'iche'te kuamũ*

<sup>1</sup> Chĩ, mũja'kupã chũ'uñe jachama'ñe pa'ijũ'u Maire Paakũni cuasajũ. Jã'aja'ñea'me pa'iche re'oja'che. <sup>2-3</sup> Diopi chũ'uũna Moisés tocha jo'kasi'e ija'che kuamũ: Mũja'kũna'me mũja'kore ña, vajũchũjũ pa'ijũ'u.

Jã'aja'ñe pani cheja rũa jeerumũ pa'ijũ pojojanaa'me,

chiimũ. Repamũ chũ'uñe cho'onare Repamũ re'oja'che cho'okaijachere kuakũ chũ'uũna charo tochasi'ea'me jã'a. <sup>4</sup> Mũsanũkona, puka'kupã, chĩ teache cho'omanejũ'u, pe'rumanearjũ. Jã'aja'ñe cho'oma'ñe cu'ache pa'iche'te ũsejũ, re'oja'che pa'iche'te che'chojũ jojajũ'u, Maire Paakũni cuasajũ Repamũ chiiche'te cho'oju aineeju paarpũ.

*Cho'oche cho'okainana'me repanare paana re'oja'che pa'iche'te kuamũ*

<sup>5</sup> Cho'oche cho'okaina icheja cheja pa'irumũ mũsanũkonare paanare ña, vajũchũjũ re'oja'che cho'oũu chini cuasajũ repana chũ'uñe jachama'ñe cho'oju pa'ijũ'u, Cristo'te cho'okaicheja'che. <sup>6</sup> Repanapi



pojoa'jɯ chini repana ñarɯmɯchi'a cho'oma'ñe si'arɯmɯ cho'oche re'oja'che cho'okaijɯ pa'ijũ'ɯ, Cristo'te cho'okaina ñamema'ñe pojojɯ Dios chiiche cho'okaijɯ pa'icheja'che. <sup>7</sup> Mɯsanɯkona cho'oche re'oja'che cho'oɯache cuasajɯ masi cho'oju pa'ijũ'ɯ, mɯsanɯkona Maire Paaku'te cho'okaijɯ pa'icheja'che. “Pãichi'a cho'okaimɯ chu'ɯ ie”, chiima'ñe, “Dioni cho'okaiɯ pa'imɯ chu'ɯ”, chiijɯ cuasajɯ rɯa masi cho'okaijɯ pa'ijũ'ɯ mɯsanɯkona cho'oche. <sup>8</sup> Pãi chẽa paanana'me chẽa paamana re'oja'che cho'osi'e ro'ire Maire Paakuji repana cho'osinɯkorɯ pa'iche ũcuanɯkore te'enarechi'a re'oja'chere si'acairo ñsikɯna koojache masime mɯsanɯkona.

<sup>9</sup> Ūcuaja'che mɯsanɯkona cho'oche chũ'ɯna, asarepajũ'ɯ. Re'oja'che cho'oju mɯsanɯkonare cho'oche cho'okainare pe'ruma'ñe chũ'ɯju pa'ijũ'ɯ. Iere cavesɯma'ñe cuasajũ'ɯ: Cɯnaɯmɯ Pa'iku Maire Paaku mɯsanɯkonare ũcuanɯkore Paaku'mɯ, ainana'me cho'oche cho'okainare. Ūcuanɯkore ũcupa'rɯva chiijɯ mɯsanɯkona cho'osi'e ro'i cho'osinɯkorɯ pa'iche re'oja'che si'acairo ñsija'mɯ Repau.

*Diore cuasana vatire cavache'te kɯamɯ*

<sup>10</sup> Asarepajũ'ɯ, chu'ɯ majapãijana. Maire Paaku ni cuasajɯ sẽejũ'ɯ, Repau peore masicheji cho'okaiɯna koka paajɯ cacu'ama'ñe pañu chini. <sup>11</sup> Sõtao cavapi'rajɯ peore cavakãña sa'checheja'che Dioni rɯa sẽejũ'ɯ, Ūcuauji cho'okaiɯna jorechu'opi mɯsanɯkonani vatipi cacu'ora chiito koka paajɯ cacu'ama'ñe pañu chini. <sup>12</sup> Pãire cavama'me mai. Cɯnaɯmɯ pa'inare cu'ache chũ'ɯnani vati ainani cavanaa'me mai, re'oja'che pañu chini. Repana vati aina chijachejaja'che cu'ache pa'inani pãi paajɯ chũ'ɯme. <sup>13</sup> Jã'ajekɯna sõtao cavakãña sa'checheja'che Dioni rɯa sẽejũ'ɯ, Ūcuauji cho'okaiɯna

juvomasiju vati musanukonare cu'ache cho'orumu ũcua cacu'ama'ñe pañu chini.

<sup>14</sup> Ija'che pa'iju cacu'ama'ñe pa'ijũ'u: Sōtao kãña sa'che ka'raja'imanea'ku chini corejakãña pi'iche tũñañeja'ñe Dios chu'o ũcuarepare che'che masijũ'u. Sōtaopãĩ ã'capũãre asi cho'ocojñoñe'te cuheju cunakãña tũñeja'ñe re'oja'chechi'a cho'ojũ pa'ijũ'u. <sup>15</sup> Sōtaopãĩ ku'ire'oa'ku chini botakoro ju'iju ku'icheja'che Diore re'oja'che ja'me pa'iche'te kuvavajuchuma'ñe kuvaju ku'ijũ'u. <sup>16</sup> Ũcuaja'che sañoã toa pa'ĩñoãre saocojñoñe'te cuheju sōtaopãĩ tã'tako'ña cãjiñeja'ñe Dioni cuasaju sēēju pa'ijũ'u, vatipi musanukonani cu'ache cho'oto Diopi tã'takaau chini. <sup>17</sup> Sōtaopãĩ sījore asi cho'ocojñoñe'te cuheju cunatuhiroã tuhicheja'che Jesucristo maire jũni ro'ikaisi'ere si'arumu cuasaju pa'ijũ'u. Sōtaopãĩ cavapi'rajũ va'jña sia cãjiñeja'ñe Dios chu'ore masiju Dios Rekochoji cho'okaiuna Dios chu'ore i'kaju vature cajejaijũ'u. <sup>18</sup> Jã'aja'ñe pa'iju ũcuauacheji ti'jñeto Dios Rekochoji cho'okaiuna cu'ache cho'omaneñu chini si'arumu Diore sēēju pa'ijũ'u, cuhasoma'ñe. Ũcuachi'a, ñarepaju pa'iju, Dios neenare ũcuanukore si'arumu sēekaiju pa'ijũ'u, cu'ache cho'omaneajũ.

<sup>19</sup> Chu'ure ũcuachi'a sēekaijũ'u Repauji cho'okaiuna Repau aperumu kuvamanesi'ere Jesucristo'te cuasache kuvachu'ore vajuchuma'ñe kuvakuna pãipi asa masia'ju chini. <sup>20</sup> Cristo Repau chu'ore chu'vaa'ku chini chu'ure chēa saosi'kuamũ. Chura Repau chu'o chu'vakujeku pãĩ chēavu'ere pa'imũ chu'u. Diore sēekaijũ'u chu'ure; vajuchuma'ñe Jesucristo pa'iche'te chekunani kuvaku pasa.

*Cuhacho tochasi'ea'me*

<sup>21</sup> Tíquico, chu'u cuasakuji, mai majapãija'iji, Cristo'te re'oja'che cho'okaikují musanukona pa'ichejana sani chu'u cho'ochena'me chu'u pa'iche kuaja'mu. <sup>22</sup> Já'are chini musanukona pa'ichejana saomu chu'u repa'u'te chukuna pa'iche'te kuakuna asa pojoa'ju chini.

<sup>23</sup> Mai Ja'ku Diona'me Maire Paaku Jesucristo cho'okaa mu sanukonare chukuna majapãijanare, musanukonapi Repa'uni cuasaju sãinechi'a oiju re'oja'che paapu chini. <sup>24</sup> Maire Paaku'ni Jesucristoni chijju cuhasoma'ne cuasanare ucuanukore oi'u re'oja'che cho'okaa Dios. Re'omu.

Pablo

Dios Chu'o Kuaphuro

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 4 Mar 2022

87a345ac-83c6-51ad-8750-17a703f38bcc